

Den AMBIENTE



Ademas di tin e honor di actua na e apertura di Super Bowl na New Orleans...

D2U-365 LO PRESENTA PA MAS DI 5 MIL PERIODISTA DI ESTADOS UNIDOS...

** Manera ya ta conoci cu e popularisimo brassband D2U-365 lo viaha pa New Orleans, USA, dia 21 di januari proximo, na unda nan lo bay tin e honor pa presenta durante e magno apertura di SUPER BOWL, cual ta un di e eventonan deportivo mas importante na Merca y cu tin un interes sumamente grandi rond di mundo den cual e lo ser transmiti envivo pa henter universo.

Esaki sigur ta un di e honornan di mas importante riba tereno musical cu nos isla turistico por a ricibi, ya cu ademas di actua dilanti e multitud di por lo menos 68 mil alma, tambe esaki lo ser cubri exclusivamente pa e prestigioso canal di television FOX, cual canal tambe a realiza e ultimo serie mundial.

Na e ocasion tan importante aki, sigur lo bay sirbi como un oportunidad historico pa nos orguyonan di Aruba, D2U-365 promove nos cultura rond mundo mediante e ritmo original y modifica di asambeho.

Prome cu e gran final di Super Bowl, D2U-365, lo tin un compromiso hopi serio durante e "NEW ORLEANS CITY PARADE, THE ART OF THE GAME EXTRAVAGANZA", debi cu esaki lo ser transmiti envivo pa e magnate canal FOX-TV.

Ademas di a ricibi e dos honornan maximo aki, tambe D2U-365 a bin na remarke pa deleita e mas cu 5 mil periodistanan for di diferente estadonan di merca durante un grandioso "kick-off party" cu lo ser realiza den e colosal Louis Armstrong Park.

Un otro honor grandi cu D2U-365 a ricibi tambe ta un presentacion special pa mas cu 700 periodista di diferente paisnan cu ta na New Orleans pa cubri e mundialmente famoso Super Bowl.

No tin duda cu despues cu e ritmo asambeho dal e periodistanan tanto di merca como esnan internacional



asina duro, cu nan lo bay pone hopi enfasis riba e ritmo aki, cual naturalmente tambe lo bay sirbi como un promocion inpagable pa nos isla turistico.

Esaki DEN AMBIENTE por bisa cu tur frankesa, ya cu DEN AMBIENTE na varios ocasion tabatin e oportunidad pa presencia e actuacionnan internacional di D2U-365, y den tur nan presentacion tanto na St. Maarten, Miami, Florida y Brooklyn, New York, D2U-365 tabata realmente un digno EMBAHADOR di nos cultura.

Pues pa e viahe sumamente importante aki apesar cu e ta cay net den e temporada di carnaval, henter pueblo di Aruba por tin e siguransa cu D2U-365 lo bay realiza un bunita papel cu lo pone nos isla maravioso su luz briya aun mas.

For di momento cu e viahe aki a ser confirma pa e alto ehecutivonan di Super Bowl, inmediatamente D2U-365 a cuminsa ensaya den un forma mas extenso mirando e importancia di gran valor aki.

Combersando cu e relacionista publico di e famoso brassband aki, esta

Ufo Escudero, el a duna di conoce cu D2U-365 a en-

saya un repertorio special cu sigur lo bay cay na agrado di un i tur na New Orleans. Por

a compronde cu e invitacion aki a bin net despues di nan

presentacion durante e exitoso Labour Day Parade na Brooklyn, New York.

Tabata danki na e presentacion na New York cu a pone cu D2U-365 a bin na remarke pa actua den e prestigioso eventonan na New

Orleans, asina un Ufo sumamente contento a declara na DEN AMBIENTE.

Ufo ta sigui conta cu e viahe aki cu ta net den e temporada di carnaval, tambe a cay un tiki fastioso pa nan, pero mester tuma na cuenta cu e viahe aki hamas y nunca por ser rechasa. Ufo na palabra: "Nos lo bay New Orleans pa un siman, y despues nos lo ta na Aruba bek net na tempo pa anima tanto e grupo cu ta desea como henter pueblo di Aruba durante e actividadnan mas importante di nos Carnaval 43". Naturalmente Ufo Escudero den number di tur e integrantenan di D2U-365 kier a gradici famia Lacle di Pueblo Foodcenter, Minister Tico Croes y American Airlines, kendenan sin nan valioso cooperacion, hamas D2U-365 por a realiza e viahe "SUPER BOWLIS-TICO"...

** Fotonan ta ilustra D2U-365 den pleno ensayo pa New Orleans riba plaza Kwihi Inn kendenan ta cooperando tremendamente cu D2U-365.

